

摘藻堂四庫全書薈要

集部

欽定四庫全書薈要

集部

元文類卷二十

三五

詳校官候選知縣臣吳甸華



欽定四庫全書薈要卷二萬一百六

元文類卷二十三

元 蘇天爵 編

平雲南碑

程鉅夫



國家繼天立極日月所照罔有內外雲南秦漢郡縣也
負險弗庭憲廟踐阼之二年歲在壬子我世祖聖德神
功文武皇帝以介弟親王之重授鉞專征秋九月出師

冬十二月濟河明年春歷鹽夏四月出蕭關駐六盤
八月絕洮踰吐蕃分軍為三道禁殺掠焚廬舍先遣使
大理招之道阻而還十月過大渡河上率勁騎繇中道
先進十一月渡瀘所過望風款附再使招之至其國遇
害十二月傳其都城城倚點蒼山西洱河為固國主段
興智及其柄臣高泰祥背城出戰大敗又使招之三返
弗聽下令攻之東西道兵亦至乃登點蒼臨視城中城
中宵潰興智奔善闡追及泰祥於姚州俘斬以徇分兵

略地所向皆下惟善闡未附明年春留大將烏蘭哈達
經略之上振旅而還未幾拔善闡得興智以獻釋不殺
進軍平烏蠻部落三十七攻交趾破其都收特磨谿洞
三十六金齒白衣羅鬼緬中諸蠻相繼納款雲南平列
為郡縣凡總府三十七散府八州六十縣五十甸部寨
六十一見戶百二十八萬七千七百五十三分隸諸道
立行中書省於中慶以統之大德八年平章政事伊蘇
岱爾建言所領雲南地居徼外歷世所不能臣先皇帝

天戈一麾無思不服今其民衣被皇明同於方夏幼長
少老怡怡熙熙皆自忘其往陋非神武不殺之恩不及
此惟黜蒼之山嘗駐蹕焉若紀聖功刻石其上使臣民
永永瞻仰於事為宜中書以聞制曰可以命詞臣臣文
海再拜稽首而言曰世祖皇帝之德大矣辟如天地之
無不持載無不覆燾而生生之意恒寓於雪霜風雨寒
暑變化之中物之蒙之者薰然而溫灑然而濯翕然而
同靡然而順有不自知其然而然者故其功烈之崇基

業之廣貫三靈而軼千古夫以大理之昏迷旅拒虐我
使人若奮其武怒俾無遺育可也而招徠綏緝終釋其
主弗誅烏虜徵天地之德孰能與於此乎今陛下建中
和之政凡以繩祖武厚民生無所不用其極中外欽承
無遠弗届是以藩方大臣於錢穀甲兵之外惓惓以光
昭令德為請其知為政之本也已漢世宗從事西南夷
天下為之騷動蜀民咨怨喻之諄諄鑿池蒞習再駕而
後取之其視今也孰愈穆王周行寓縣必皆有車轍馬

跡焉初非疆理天下也而世猶誦之至今其視跋履山川洒濯其民而納於禮義之域孰愈彼碧鷄金馬與夫點蒼皆其山之望者也漢使祭之唐季盟之夫各有所畏焉耳今也鐫未始磨之崖紀無能名之績桓桓熒熒與世無極豈惟足以震百蠻榮千古其餘光所被山川鬼神與嘉賴之嗚呼盛矣哉臣事先皇帝蚤受眷知今復待罪禁林發揚蹈厲職也不敢以荒落辭謹再拜稽首而系之詩曰

於皇維元載地統天大噫小噓曰寒以暄粵西南風水
駛山蓄風霆流形氣交神州跂息蠕蠕勾萌鮮鮮谷飲
巢居燕及跼鳶繫誰之恩聖祖神孫武烈文謨瀚被生
存既有典常被之服章我吏我民我工我商萬國一家
孰為要荒點蒼蒼蒼禹迹堯牆井鉞參旗終夜有光威
不遠顏作善降祥嗟爾耄倪視此勿忘

太師廣平貞憲王碑

閩復

三台平乾象以清五嶽奠坤載以寧三公得人鼎祚以

隆蓋力莫競於柱天勲莫高於靖亂忠莫大於扶日惟
我太師廣平貞憲王伊囉勒公自乃祖乃父光輔聖元
豐功盛業在天壤間猶星之有台山之有嶽歟公阿爾
拉人小字伊實迨至貴顯寵以不名賜號伊囉勒諾
延譯云能官也始祖勃端察爾以才武雄朔方曾祖納
哈塔阿爾斯蘭所居與烈祖神元皇帝接境素敦仁禮之好
祖博爾濟贈推忠協謀佐運功臣太師開府儀同三司
謚武忠父博囉台贈推誠宣力保順功臣太師開府儀

同三司謚忠定並追封廣平王廣平王家分地故以封之武忠志意沉雄善戰知兵太祖聖武皇帝在潛共履艱危義均同氣征伐四出無往弗從時諸部未寧每遇武忠警夜寢必安枕寓直於內與語或至達旦魚水之契殆若天授初納爾沁部卒盜吾牧馬武忠共往追之時年十三知其衆寡不敵乃為出奇從旁夾擊之寇捨所掠而去及戰台實衛喇特鋒鏑既交約畢命勝敵無或退步武忠繫馬於腰跽而引滿方寸不離故處太祖推

其膽勇嘗潰圍於克埒太祖失馬武忠擁與累騎而馳
頓止中野會天雨雪張毳裘以醫及旦雪深數尺龍顏
弗霑武忠植立通夕足跡宛然不移顛沛造次脫主於
難雖古烈士無以加默爾奇斯之戰風雪迷陣再入敵中
求太祖不見急趨輜重則御勒已還卧憇車中聞武忠
至曰此天贊我也及傳天下君臣之分益密視夫人穆
爾德濟不廢丘嫂禮皇子察哈台出鎮西域有旨從武
忠受教武忠教以人生經涉險阻必獲善地所過無輕

舍止謹白龍魚服之戒玉音謂皇子曰朕之教汝亦不
喻是武忠既老以病薨太祖悼痛如喪所親初忠定之
生方還自默爾哥斯戰所中塗護視不啻如已子長率父
兵襲爵萬夫長國初官制簡古置左右萬夫長位諸將
之上首以武忠居右東平忠武王居左翊衛辰極猶車
之有輪身之有臂電掃荒屯鰲奠九土柱天之力競矣
貞憲王伊囉勒公器量宏達襟度淵深莫測其際弱歲
襲爵統按台部衆世祖皇帝聞其賢驛召赴闕見其風

骨麗厚解御服銀貂以貺國朝重天官內膳之選特命
領其事侍宴內殿公起行酒詔諸王妃皆執婦道未幾
拜御史大夫江南既下裂土益封功臣後即以泉州路
為分邑公長臺憲務振宏綱弗親細故興利之臣欲援
亡宋舊制併憲司入漕府他日當政者又請以郡府之
吏互照憲司檢底公言風憲所以戢姦若是有傷監臨
之體其議乃格公事上遇下一本於誠事有廷辯當雷
霆之下辭益鯁直天顏為之霽威至元二十四年宗王

納新叛東鄙世祖躬行天討命公總戎以先之大駕至
半道則公已退敵僵尸覆野數旬之間三戰三捷獲納
新以獻詔選乘輿駝畜百蹄勞公公謝曰天威所臨猶
風偃草臣何力之有駕還留公勦絕餘黨執其酋金嘉
努獻俘於朝同惡數人戮之軍前明年納新餘燼哈坦
圖嚕汗復叛再命公出師兩與敵遇皆敗之追及兩河
威乘破竹敵衆大斂酋長遁去時已盛冬聲言駐兵期
俟春方進忽倍道兼行過黑龍江徑擣巢穴殺戮殆盡

其酋莫知所終夷其城郭鎮撫遺黎而還國家承平日
久而變生肘腋貽九重宵旰之憂公英猷載奮不期月
而三叛悉平靖亂之勲偉矣詔憫其勞賜內府七寶冠
帶以旌之加太傅開府儀同三司申命禦邊杭海二十
九年加錄軍國重事知樞密院事宗藩帥鉞一切稟命
於公特賜步輦入內位望之崇廷臣無出其右三十年
今上皇帝以皇孫撫軍北邊公為輔行請授祿考所佩
儲闡舊璽詔從之鼎湖上仙公奉鑾馭而南宗室諸王

畢會上都定策之際公起謂皇兄晉王曰宮車遠駕已
踰三月神器不可久虛宗祧不可乏主疇昔儲闈符璽
既有所歸王為宗盟之長奚俟而弗言王遽曰皇帝踐
阼願北面事之於是宗親大臣合辭勸進公復坐曰大
事已定吾死且無憾惟公一言合臣民共戴之誠成先
皇付託之意扶日之忠至矣上即位之始進秩太師佩
以尚方玉帶寶服還鎮北邊元貞元年冬議邊事入朝
兩宮賜宴酬酢盡歡如家人父子然先是夫人圖古勃

蒙賜侍宴之服曰只孫昭異數也命婦獲受此服由公
家始自餘奇珍祕寶賞賚弗可殫紀還鎮有期不幸遭
疾以十一月十八日薨於賜第之正寢雨水冰者連日
春秋五十有四上聞之震悼不已敕有司給喪賻賵有
加剝香木為棺錮以金銀北塋於怯土山之原大德五
年春詔贈宣忠同德弼亮功臣依前太師開府儀同三
司錄軍國重事御史大夫追封廣平王謚曰貞憲祖妣
穆爾德濟妣完顏氏及夫人綽爾齊夫人圖古勒皆封廣

平王夫人綽爾齊先卒圖古勒今主家事訓迪諸子克成
奉先述繼之美子男三人曰穆哩庫曰托琳曰托克托
呼女三人曰實喇適太師興元忠憲王諤勒哲之子中
書右丞長壽曰布呼齊適宣政使達實密之子泉府少
卿布實圖曰班辰在室穆哩庫年未及冠詔選皇彌孫
女巴特瑪妻之仍襲爵萬夫長復命公之介弟都齊為
御史大夫九年春有詔為公植碑通達載揚丕績事下
翰林為文臣復竊惟伊尹相湯伊陟復稱名臣呂望興

周呂伋嗣封大國載在方冊以為美談公家歷事累朝
奕世載德師垣萃於一門王爵加於異姓其視商周賢
佐宜無少讓以之勒景鍾光信史其誰曰不然小臣作
銘不獨表異渥於宗臣尚篤子孫忠孝之勸銘曰皇元
肇基天挺神武祝栗驤龍崆峒嘯虎猛將如雲謀臣如
雨矯矯武忠攀鱗附羽草昧經綸疏附禦侮力竭肱股
誠殫心膂忠定桓桓勲伐繼樹命佐商周德符伊呂鰲
斷立極鷹揚啟土元祚如天忠力可柱顯允貞憲事予

世祖網振烏臺望崇紫府冠起東藩天戈奮舉公任前
鋒氣盈一鼓敢以虜憂遺之君父駕至中途公已退虜
一戰而勝還師帝所孽燼復然餘勇再賈威乘破竹敗
之水滸三叛悉平遺黎按堵天語勞公賞錫繁舞公曰
天威如拉朽腐還鎮朔方彈壓虎旅日贊重明龍飛九
五乃冠台躔乃執圭珪公之庇民如室斯宇公之衛社
如棟斯礎方倚長城遽停相杵當宁盡傷行路悽楚褒
德賞功恩洽施普績紀金石家聯簪組咨爾後人無替

金史卷之二十一
卷二十一
成矩泰山如礪黃河如縷爵以永傳焜耀千古

太師淇陽忠武王碑

元明善

粵若稽太祖法天啟運聖武皇帝誕膺景運龍奮朔方滅克呼主王可克奈曼主廸延可克以至西夏西域金源次第平時則有佐命元勲曰博爾歡曰博爾濟曰穆呼哩及即寶位錫之券誓慶賞延于世世故朝廷議功選德必首三家焉臣謹按忠武王諱伊徹察剌姓許慎氏曾大父即博爾歡也自太祖早年已見神聖委心臣

事大業肇基身餘百戰竟薨于敵是時官制簡古止為
第一千戶後封於淇州又食沅州六千戶贈推忠佐命
著節功臣開府儀同三司太師上柱國追封淇陽王夫
人特克追封淇陽王夫人子托歡王之大父也嗣父
官佐憲宗皇帝四征不庭日開土疆厥功為懋薨贈推
誠翊運佐理功臣開府儀同三司太師上柱國追封淇
陽王夫人圖們追封淇陽王夫人子寶勒們王之父也
恒鎮徼外後征六詔懷服諸蠻遵疾薨于軍贈崇仁宣

理保德功臣開府儀同三司太師上柱國追封淇陽王
夫人石氏金宰相女也追封淇陽王夫人夫人生王六
年王之父薨誓不他適王性仁厚儉勤事母備諸孝敬
資貌英偉望之如神世祖皇帝雅聞其賢後閱其父之
死事也年十六召見容止端重奏對詳明上驚喜曰實
勑們有子矣即命領四集賽台官集賽者國制分宿衛
供奉之士為四番番三晝夜凡上之起居飲食諸服御
之政令集賽之長皆總焉至元十七年長一集賽明年

詔曰伊徹察剌秉心忠實執事敬慎知無不言言無不盡曉暢朝章用輒稱旨不可以其年小而遲其官可代錫津為宣徽使制下階正議大夫兼領尚膳院光祿寺二十年加階中奉二十六年上討反者于杭海皆陳王奏曰丞相安圖已延御史大夫阿爾婁皆嘗受命征戰三人者臣不可以後之今勅賊逆命敢禦天戈陛下憐臣賜臣一戰上曰乃祖博爾歡佐我太祖無征不在無戰不克其勲大矣卿以為安圖輩與爾家同功一體各

立戰功自恥不逮然親屬囊鞬恭衛朝夕俾予一人不
逢不若爾功非小何必身編行伍手事斬馘乃始快心
邪二十七年僧格既立尚書省鼙鼓上聽殺異已者指
天下口以刑爵為貨而販之咸走其門入貴價以買所
欲貴價入則當刑者脫求爵者得不四年綱紀大紊人
心駭愕尚書平章政事伊蘇岱爾王之太官屬也潛以
其事告王王奮然奏劾僧格伏誅上曰伊徹察喇口伐
大姦發其蒙蔽乃以沒入僧格黃金四百兩白金三千

五百兩及水田水磴別墅賞其清彊僧格既敗上以湖廣行省西連番洞諸蠻南接交趾島夷延袤數千里其間土沃而人夥畬丁溪子善驚好鬪非賢方伯不能撫安王舉哈喇哈遜達爾罕以為其省平章政事凡八年威德交孚飛聲海外入為丞相天下稱賢二十八年都水使者請鑿渠西導白浮諸水經都城中東入潞河則江淮之舟既達廣濟渠直泊於都城之匯上亟欲其成又不欲役及細民敕四集賽人及諸府人與鑿所司高

深之分賦之刻日使畢王率其屬著役者服撻菴鍾即
所賦以倡趨者如雲依刻而渠成賜渠名通惠河而河
為公私大利上語近臣曰是渠非伊徹察喇身率衆手
成不亟也賞以黃金五十兩白金五千兩寶鈔五千貫
三十年上以王佐命元勲之後庶白而能加以摧姦薦
賢遷金紫光祿大夫知樞密院事仍宣徽使明年成宗
皇帝登極制日伊徹察喇盡其誠力深其謨謀抒忠於
國流惠於人可加開府儀同三司太保錄軍國重事樞

密宣徽兩使如故大德四年拜太師初金山南北叛王海都都勒幹據之不奉正朔垂五十年時入為寇恒命親王統左右部宗王諸帥屯列大軍備其衝突五年朝議北師少怠紀律或失命王亞晉王噶瑪拉以督之是年海都都勒幹入寇我為五軍王將其一鋒交軍頗不利王視之怒被甲持矛身先陷陣一軍隨之出敵之背五軍合擊敵大崩潰海都都勒幹遁去王亦罷兵歸鎮賞功誅臯恩威服於敵人厥後都勒幹來請臣附時武

宗皇帝亦在軍王遣使與武宗及諸王將帥議曰都勒
幹請降為我大利固當待命於上然往反再閱月必失
事機事機一失為國大患人民困於轉輸將士罷於討
伐無有已時矣都勒幹之妻我弟瑪古哈喇之妹也宜
遣報使許其臣附衆議為允既遣始以事聞上曰公深
識機宜既而瑪古哈喇復命由是叛人稍稍來歸十年
冬叛王莽賚特穆爾等屯于金山武宗帥師出其不意
先踰金山王以諸軍繼往壓之以威啖之以利莽賚特

穆爾乃降其部人驚潰王遣圖們特穆爾察罕將萬衆
深入其部人亦降徹伯爾者海都長子也海都死嗣領
其衆至是我軍掩取妻子及其部人兩部凡十餘萬戶
十一年武宗入踐天位詔曰公弼亮三朝荐立武功朕
嘉賴焉徹伯爾女雅克特穆爾帝室之胄今以妻公賜
公以世祖宴幙成宗御輦及幙人樂工海東白鶻文豹
至大元年王遣使奏曰諸王圖呼納本懷携貳而徹
伯爾遊兵近境叛黨素無悛心儻合謀致死則垂成之

功顧為國患臣以為昔者都勒幹先衆請和雖死宜遣使安撫其子庫色使不我異又諸部既已歸明我之牧地不足宜處諸降人於金山之陽吾軍屯田金山之北軍食既饒又成重戍就彼有謀吾已擣其腹心矣奏入上曰是謀甚善公宜移軍阿拉哈克繖薩哈地王既移軍徹伯爾圖呼納欲奔庫色不敢納去留無所遂相率來降於是北邊以寧上詔王曰公之先佐我祖宗常為大將攻城戰野勲烈甚著公國之元老宣忠底績清謐

中外朕昔入繼大統公之謀猷又多今立和林等處行

中書省以公為右丞相依前開府儀同三司太師錄軍

國重事特封淇陽王佩黃金印宗藩將領實瞻公麾進

退其益懋乃德志乃心力毋替所服四年壬午朝令上

皇帝燕之于大明殿眷禮優重九月六日疾病敕御醫

數輩診療越三日薨于大都私第之正寢是夕大雨春

秋六十有三皇太后賻鈔二萬五千貫上敕少府以香

木為棺給驛馬百送塋北地詔議飾終之典翰林臣請

贈宣忠安遠佐運弼亮功臣太常臣請謚忠武宰相請其階官封如故制曰可夫人摩該公主宗匡鄂齊爾孫女也伊遜展公主宗王塔齊爾孫女魯王托克托女兄也雅克特穆爾公主既徹伯爾女也齊喇布薩氏千戶裕隆特穆爾女也鄂勒哲扎拉爾氏呼圖克台扎拉爾氏右丞相東平王女弟也並封淇陽王夫人子男七人曰達爾罕夫人齊喇所生端良剛毅有古大臣風至元三十年佩金虎符特授昭勇大將軍左都威衛使大德元

年三月加階昭武七月遷榮祿大夫徽政使仍左都威
衛使四月兼樞密副使六年遷同知樞密院事八年兼
宣徽使十年閏正月加光祿大夫七月遷知樞密院事
武宗即位之歲五月詔曰卿事裕宗皇帝裕聖皇后為
善則多不善則不聞也卿其相朕奏曰中書大政所出
細而金穀鉅則銓選臣國人也素未嘗學樞密宣徽徽政三
使所領已繁又長集賢及春秋隨駕蒐獮誠不敢舍是
以奸大政固辭勅曰卿元勲賢副舍卿復孰相哉其勿

辭拜銀青榮祿大夫中書左丞相仍領餘職他日詔曰
成宗嘗賜卿江南田六千畝今加賜四千奏曰萬畝之
田歲入萬石臣侍罪宰相先規已利人謂臣何江南民
力極矣請辭萬石之入入官以蘇民力上悅而允六月
拜太保錄軍國重事太子太師加階開府儀同三司依
前左丞相七月拜右丞相監修國史師保領錄如故未
幾上手授太尉印奏曰世祖未嘗以此官官人臣不宜
受奏可至大改元加領中政使其年四月二十有四日

從幸上都至懷來以疾薨贈智威懷忠昭德佐治功臣
太師上柱國追封淇陽王謚輝武夫人綽斯滿公主宗
王徹迪爾孫女也伊爾根公主宗王寶達爾女齊王班布
爾實女兄也穆呼哩薩敦官人孫女也竝封淇陽王夫
人曰瑪勒夫人諤勒哲所生由內供奉為大宗正府伊
克扎爾古齊武宗時奏曰臣家以武顯而臣方壯不効
節於大敵臣羞此生上大悅授光祿大夫假左丞相行
大宗正府伊克扎爾古齊于北軍夫人布展公主宗王

裕魯勒女也繅勒噶公主宗王烏魯斯女也鄂都丹宣徽

使克呼女也曰呼爾圖穆克公主所生六歲時裕聖皇

后命待武宗武宗出撫北軍年十八今上淵潛時領府

中四集賽太官服奉御是年六月特授榮祿大夫宣徽

使九月加儀同三司右丞相仍賜江西良田萬畝奏曰

臣首受此田指臣求賜者多矣臣願還田縣官有敕依

至大元年二月加階開府兼尚服使九月加中政使十

月拜太師兼前衛親軍都指揮使阿克蘇衛指揮使左

都威衛使丞相宣徽尚服中政等使如故十一月上面諭曰公祖父宣力我家公之輔朕克廉克謹小心範物今旌德錄功爵公為郡王已敕主者施行奏曰臣年德俱少所領事多恒懼獲罪王爵至重臣不敢受上曰公辭之良是然誰如公乃賜海東白鶻白文豹二年兼知樞密院事三年二月加錄軍國重事五月左右部諸王宗戚大會于上都會歸例皆有賜而舊分忠武王黃金百五十兩白金二千五百兩錦綺五段上曰所賜太師

如其父分奏曰父所受已重釀賞何可滂沛臣家准奏

十月上命為尚書省大丞相奏曰尚書省銓選刑名非
臣所諧乞寢新命上悅其誠聽焉今上之初詔曰公輔
先帝盡忠無隱廉介貞白今命公嗣父長集賽皇慶改
元正月佩父印嗣淇陽王制下階仍開府儀同三司夫
人實喇塔納公主楚王塔爾呼岱女也曰多托爾阿
布哈摩該公主所生內供奉曰額森特穆爾曰諾爾丹
並伊遜展公主所生內供奉曰巴圖庶出女七人曰伊

遜展為千戶集賽夫人曰蒙克為魯王阿雅噶齊妃曰庫
庫齊為宗王錫錫妃曰濟勒岱為宗王罕扎妃曰雅克
曰雅克呼圖未適曰寶努為宗王齊齊克圖妃孫男
五人曰特穆爾阿布哈丞相子也昭勇大將軍嗣左都
衛使遷中奉大夫通政使曰諤勒哲特穆爾丞相子也
曰阿爾穆蘇巴哈曰阿達和卓並淇陽王子也曰哈卜齊
勒輝武王子也孫女五人曰拜達爾為宗王實喇卜妃曰
烏濟罕為親王綽斯本妃曰博囉哈斯罕為越王阿勒

達爾實哩妃曰茂海曰巴勒丹俱幼曾孫一人圖烈巴哈
特穆爾阿布哈子也王既葬二年樞密副使雅爾圖傳詔
中書曰故淇陽忠武王其視故廣平王阿爾婁例為之
建碑都城健德門外命翰林直學士明善撰碑文平章
政事珪書丹翰林學士貫篆額臣既受命懼不克奉明
詔乃從其家得其世次行實則歛衽而論曰惟天朝一
家九州四海遐邇畏威懷德者蓋許慎氏與有力焉惟
許慎氏五世六王六太師始終恩數赫奕者實天朝有

大造焉然忠武王之為父輝武王丞相淇陽王之為子以
慈以孝移仁移忠宜乎男婚帝族女媿王家入垂子則
出垂臣範巖巖焉曄曄焉世有休仁蓋將與天朝胥慶
于億萬年臣不敏敢稽首而為之銘銘曰

維天有命聖人膺之維聖創業賢臣興之維家開國孝
子承之嗚呼休哉孰足徵之赫赫太祖實啟帝圖桓桓
淇王為帝前驅淇王子孫四世惟肖猗忠武王克忠克
孝爰稽忠武始事世祖夙夜左右無怠寒暑親猶股肱

親猶腹心我聞古人斯焉在京朝有柄臣肆其欺姦
爭面指羣罪不瞞舉賢于側才足經國試諸方國竟為
良弼帝曰上賢可保可師爾卿大夫及予倚毗北有金
山世扞反者朝用盱食邊將汗馬詔徃督師衣食予士
毋使寒饑招徠迷子凡十一年反者破膽投戈自縛
執迷孰敢敵人有言昔也狂醒使我盜兵蒙與天爭天
子神聖公甚英明賴公之英得為天氓帝曰公功進爵
為王旅力尚強永清我疆驅馬來朝告我今皇一疾不

起兩宮震傷飾終既備登嗣之良忠武之子三相兩師
婦皆王女女皆王妃古亦有君莫我君仁古亦有臣莫
忠武純烈烈大勲與日同曜淇陽真封子孫世紹忠武
神靈從帝遊天勒詩貞石垂美萬年

駙馬高唐忠獻王碑

閻復

大德九年秋七月詔謚故駙馬高唐王奇爾濟蘇為高
唐忠獻王曾祖阿勒古斯托克托古哩追封高唐忠武王
曾祖妣阿勒哈為高唐王妃祖駙馬頁赫為高唐武

毅王祖妣皇曾祖姑阿勒哈必濟濟為齊國大長公主父
駙馬阿巴哈為高唐武襄王妣皇姑伊呼為齊國大長
公主忠獻王前尚皇姊呼圖克默色追封齊國大長公
主繼尚皇女阿薩爾追封齊國公主從介弟高唐王扎
古納請也恭承卹典命府屬王元舉狀先世勲德揭銘
麗牲之碑謹按家傳系出沙陀鴈門節度之後始祖布
固翁觀部人世為部長亡金鴈山為界以限南北忠武
王一軍阨其衝太祖聖武皇帝起朔方併吞諸部有國

西北曰廸延罕者遣使哲古訥來謂忠武曰天無二日
民無二王汝能為吾右臂朔方不難定也忠武素料太
祖智勇終成大事決意歸之部衆或有異議忠武不從
即遣麾下將圖魯卜達實賁酒六榼送哲古訥於太祖
告以廸延之謀時朔方未有酒醴太祖祭而後飲舉爵
者三曰是物少則發性多則亂性使還酬以馬二千蹄
羊二千角上詔忠武異日吾有天下奚汝之報天實監
之且約同征廸延會於某地忠武先期而至既收廸延

天兵下中原忠武為嚮導南出界垣留居鎮守為疇昔

異議所害長子布延實保死焉武毅尚幼王妃阿勒哈

挈之偕猶子鎮國夜遯至界垣門已閉訴於守者緦垣

以登逃難雲中太祖聞忠武死悼痛不已戎事方殷未

暇治也雲中既下詔求王妃二子得獲賙卹孤嫠甚渥

鎮國至封北平王握金印武毅自齧亂太祖携征西域

還年十七鎮國已卒繼封北平王尚齊國大長公主仍

約世婚敦交友之好號諱達呼拉鎮國之子尼古爾岱亦

封北平王尚睿宗皇帝女塔瑪噶公主畧地江淮歿於
戎事詔以興州戶民千計給葬其戶至今隸王府齊國
大長公主明慧有智畧祖宗征伐四出嘗攝留務軍國
大政率諮稟而後行師出無內顧之憂公主之力居多
初武毅未有子公主為進姬侍以廣嗣續鞠育之恩不
啻己出子男三人長準巴哈仲武襄王季珠爾巴哈準
巴哈尚定宗皇帝長女伊勒默色公主從憲宗皇帝
伐宋至釣魚山宋人堅壁不下我師環攻宋卒乘壁

而詔傍有坐而張蓋者以謂弧矢莫我及也準巴哈
素善鞭箭射之以顛遂拔其壘三子曰囊嘉特曰且
琳沁曰安圖且琳沁尚宗王阿濟格女回鶻公主國
朝之制凡宗室之女皆稱公主武襄雖貴為帝壻總
戎日多家居日少中統初霧起闕牆敗叛將庫庫布哈
於阿勒坦和爾和獲其屬鎮海濟南之役環城當南面
寇數出南門禦以勁兵輒復內竄以至授首還率所
部從大軍伐叛西北敗叛王之黨色埒默於崆果囉

數日之間會戰凡七俘獲甚衆色埒默尋復來歸珠爾
巴哈鎮雲南而卒子和斯丹尚宗王博囉齊女珠赫公
主武襄所尚齊國大長公主世祖皇帝季女也生四子
長忠獻王次額森哈瑪爾早世次哈爾巴台耽嗜儒術
尚宗王諤勒哲女紐倫公主今高唐王尚宗王烏嚕台
女額默根公主早卒再尚宗王納喇巴哈女阿納圖
呼魯公主女三人必咱雅為皇兄晉王妃伊囉幹為宗
王阿勒坦巴哈妃和塔拉為河間王阿布哈妃忠獻王

生長北方金草之用固其所長而崇儒重道出於天性
興建廟學裒集經史築萬卷堂於私第講明義理陰陽
術數靡不經意宗王伊布幹叛率精騎千餘併行旬
日追及之時天盛暑將戰北風大起衆請勿戰王曰盛
暑得風天贊我也策馬以先大敗敵軍殺掠殆盡叛王
以十餘騎竄是役也王身中三天一矛斷其髮凱旋詔
賞黃金二鎰白金千鎰聖上御極之初特頒金印封高
唐王駙馬封王蓋自王家始王以西北未庭請往征之

詔初不允請至再三方許之將行誓曰邊塵不清義不旋轡大德改元夏四月與敵遇於巴雅斯或謂俟大軍畢至戰未晚也王曰大夫為國死敵奚以衆為於是鼓噪而進大破敵軍殺傷甚衆擒將卒百餘人以獻詔嘉其勇果賜以先王所御貂裘寶鞍繒錦七百介冑兵器有差二年秋諸王將帥會于邊共籌邊事咸謂往歲敵無冬至之警宜各休兵境上王曰今秋候騎至者甚寡所謂鷙鳥將擊必匿其形兵備不可弛也衆不以為然

王獨嚴兵以待是冬敵果大至彼衆我寡三戰三却之王乘勝追奔遂北深入險地後騎莫繼不虞馬傷而仆至陷敵域敵初待以壻禮數欲誘降應對之際皆效忠保節之語又欲妻之以女曰吾不覩皇太后慈顏非聖上面命不敢為壻卒不能奪其志上憫王陷敵欲遣使理索未得其人王府蓋臣曰阿昔思往在戎陣嘗濟王於險衆推其可用乃遣使敵一見王於稠人中首問兩宮萬安次問嗣子安否語未竟輒為左右所蔽翌日

遣還王竟以不屈而終嗚呼昔忠武以一旅之衆經綸
草昧去偽歸真繼以北平父子武襄昆仲被堅執銳畢
命邊陲以死勤事至王凡四世矣蓋王平生潛心聖學
綱常之分了然於胸中知義重於生故臨難無苟免可
謂無忝爾祖矣至於世締國姻奕葉封王河山帶礪子
孫世爵聖朝所以崇德報功斯亦至矣初王之北也世
子主安甫脫襁褓詔以弟哲古訥才識英偉授以金印
玉帶海東白鵲封高唐王襲爵之後恪守父祖成業撫

民御衆境內又安時齊國公主卒已久凡王之珍服祕
玩悉令謹厚者掌之以需世子成立又慨兄死節及先
德闇而弗彰俾元舉走京師列其事以聞光荷封謚之
號其孝友敦睦雖儒素承家有不逮焉嗚呼賢哉銘曰
太祖聖武握乾綱風飛雷厲起朔方忠武華胄踵後唐
彊界南北司壕隍有國西北名帶陽射日之弧期共張
告以偽謀吞厥彊孤忠竟為寇所戕帝聞其死久盡傷
世姻汝締寵渥彰鎮國金紐何煒煌武毅繼踵服王章

子復尚主歿戎行一門三將迨武襄東殄海寇斧其吭
北御遼釁平閼墻偉哉高唐忠獻王於孫衍慶疏天潢
帝姬再降惠澤滂尊師重道興郡庠俗衽金革北方強
禮義一變齊魯鄉英風勁氣直以剛捐軀報國分所當
千載烈日橫秋霜河山誓爵奕葉昌

元文類卷二十三

欽定四庫全書薈要卷二萬一百七

元文類卷二十四

元 蘇天爵 編

碑文

丞相東平忠憲王碑

元明善

皇帝嗣寶歷御宸極拜大司徒栢柱為中書左丞相明年制贈乃祖崆峒根烏達推忠効節保大佐運功臣太師開府儀同三司上柱國追封魯國王謚忠宣穆呼哩體

仁開國輔世佐命功臣太師開府儀同三司上柱國追

封魯國王謚忠武賜碑額曰元勲世德廟食東平別賜

故中書右丞相贈推忠同德翊運功臣太師開府儀同

三司東平忠憲王開國元勲命世大臣之碑碑建大都

良鄉之通達猗歟盛哉是舉也其思烈祖創業之艱念

功臣宣忠之亟勉丞相奮庸之恭歟臣承詔猥當執筆

謹按東平王世家忠憲王諱安圖姓扎拉爾氏五世祖

是為忠宣王親連天家世不婚姻太祖皇帝起兵與奈

曼人戰吾師敗績七騎走利追兵尾及困乏絕食忠宣
多力走水次縛致二歲橐駝炙其肉啖太祖太祖馬僊
六人相顧忠宣遂以已馬濟太祖步射賊而死子五人
第三子曰忠武王是為忠憲王高祖忠武與博爾濟博
勒呼齊拉袞佐太祖定天下號為四傑太祖戰失利單
走澤中天大雪忠武與博爾濟張馬韉蔽太祖卧旦起
視跡二人之足不移太祖從三十騎行磽谷間遇羣盜
突射忠武三發三殪除徹馬韉障太祖叱騎戰賊賊問

知忠武名乃解去克哩主王可克忌太祖嚴兵襲我我
得其謀太祖與忠武等悉精銳迎擊王可克敗走死諸
部以次服太祖即大位官制簡止置萬戶二乃以忠武
為左萬戶從破金師二十萬于野狐嶺北師由紫荆口
入忠武專征遼東西諸郡諸郡悉平詔授太師國王都
行省承制行事賜券傳國永世太行迤南盡委經畧金
主奔汴忠武建牙雲燕南平趙魏東定齊魯西擊晉秦
中原之地盡為國守四十年間無役不從無戰不在破

國覆邑惜殺禁剽風降景附懷仁歸義癸未三月薨于
聞喜遺命以未滅金屑為恨子曰博囉忠憲王曾祖也
嗣國王奉詔討夏攻銀肅二州斬甲首數萬擒大將達
哈詔分諸功臣邑門功第一食東平郡李全盜據益都
帥師圍全全窮出降山東安戊子三月薨于鴈山子七
人達斯嗣國王忠憲王祖考也夙以忠孝自許奮曰大
丈夫受恩明主要須決機兩陣之間取功名以報國家
庶不墮我先烈太宗皇帝改鳳翔將兵戍潼關從攻河

中追斬守將從戰京師于三峯山破四十萬人斬行省
完顏哈達樞密伊喇布哈朝行在所上顧之曰先帝肆
天功建鴻業諸國志皆臣妾獨爾東南鵠張一隅朕欲
援桴鼓衆親繫孱王爾意何居起對曰臣不逮先臣武
然奉天子威靈汎掃淮浙取彼山川歸我版籍臣敢不
以死自力政爾不煩大駕蹂卑濕之地上喜曰達斯終
能成我大志從皇子庫春南征拔宋棗陽侵郢陷光州
畧安慶己亥三月薨第二子曰巴圖爾忠憲王父也憲

宗皇帝命佐世祖軍由蔡伐宋馳檄諭江淮人帥師與
世祖會鄂渚憲宗崩內難方訖世祖以武靖總師留戍
而還及踐大寶嘗曰朕居此以臨天下巴圖爾之力也
蓋昔者與論形勢之地武靖曰帝者必居中撫八極朝
覲會同道里惟均中都南俯吳越北接朔漠左控燕齊
右挾韓晉大王必欲佐天子一大統非此不可至是定
都于燕故有此旨未幾薨于軍大德八年制贈推誠宣
力翊衛功臣太師開府儀同三司追封東平王謚武靖

夫人鴻吉哩氏昭睿順聖皇后之兄也追封東平王夫
人子男四人長即忠憲王次鼎通次布古岱次和通嗣
國王女二人長適國戚穆蘇次適太傅淮安忠武王巴
延恭惟忠憲王自中統初年世祖皇帝命掌環衛之政
令位百僚上太夫人入朝皇后一日上適叩及忠憲太
夫人起奏曰妾不敢自薦妾子以欺罔聖聽安圖年少
公輔器也上曰以何期之太夫人曰朝回必求魁公論
天下事未嘗目一輕淺謂然也以是上默識之四年反者平

執叛黨千餘人論之如法上問曰朕欲悉死此黨時年十六對曰兩主爭國彼安知有陛下且甫定神器不推曠蕩之恩顧奮私憾殺無罪人何以安反側上驚曰少年何以得老成語卿言誠開朕懷千人皆生至元二年拜光祿大夫中書右丞相別食四千戶辭曰曩爾宋竊號江南方宏聖畧奮神武以臣謬膺宰相獻笑三方宋孱生侮上改容有間曰熟思無以踰卿其勿辭奏請燕王省可中書大政奏召大儒許衡衡至詔議中書事衡

辭以疾忠憲親候於邸語移時甚契及還籌思累日不釋上時召衡諭之曰安圖練事未熟善左右之卿所練語使達朕衡對曰丞相資識聰敏雅有定操稽古獻議即解要領臣敢不竭愚罄有四年奏曰碩德如姚樞輩三二人可省中書省事上曰此輩固宜優禮五年阿哈瑪特議立尚書省乃先奏忠憲三公詔諸儒議樞密商挺昌言曰安圖國之柱石一日不可出中書進三公是崇以虛名奪其實權也衆起和之事挫不行六年大兵伐

宋先頤襄樊廟謨也七年奏曰臣近言尚書省宣奏如制其大政令大章程聽與臣議然後得聞今尚書臣違詔徑行上曰阿哈瑪特恃朕信用敢爾自專勅尚書如前詔八年陝西行省臣言歲饑盜熾若不顯戮無以威衆奏曰盜犯強竊當罪重輕一切處死法何以立罪入死者待報從之十年奏以玉冊玉寶上皇后鴻吉哩氏以玉冊金寶立燕王為皇太子兼中書令判樞密院十一年劾奏阿哈瑪特欺國害民有徵數事又奏各部及大都

路官阿哈瑪特奏擬非人乞加黜汰十二年詔行中書省
樞密院事從皇子北平王出鎮北圉遂留極邊十年不
與朝廷通二十一年三月從北平王歸上召入勞之留
語卧內四鼓而出冬十一月復拜中書右丞相進金紫
光祿大夫詔天下監察御史陳天祥劾奏右丞盧世榮
畧曰人思至元初治不能忘也去春丞相安圖還自北
邊天下聞之室家相慶咸望復膺柄用治期可立而得
果承恩命再領中書貴賤老幼喜動京師時政之治與

不治民心之安與不安繫丞相之用與不用爾又如大
夫伊蘇特穆爾丞相已延朝廷專任三相事事咨而後
行無使纖人從旁沮撓能者進能善者行善誠厚天下
之大本理天下之大策又安用掎克在位倚以為治哉
其年世榮敗中書條上世榮所為掎克諸事詔皆罷之
奏漕司諸官上曰平章右丞固取朕裁餘皆卿事顧欲
一一相煩有失寄托初意因奏曰比覺聖意欲倚近習
為耳目者臣猥列台司所行非道從其彈射罪從上賜

奈何近習伺間抵隙援引姦黨曰某人與某官以所署
事目付中書曰準勅施行臣謂銓選自有成憲若此廢
格不行必有短臣於上者幸陛下察之上曰卿言甚是
妄奏者入上其名二十四年上決意立尚書省奏曰臣
力不能回天乞不用僧格別相賢者猶或不至虐民誤
國不聽二十五年見天下大務一入尚書省屢上中書
印不許明年宰相止掌環衛又十年正月十九日以疾
薨于京師樂安里第春秋四十有九上悼惜久之曰人

言丞相病朕謂不然果喪良輔詔重臣監護喪事家老
一無所受素車樸馬歸葬濟蘭圖之先塋忠憲王巍然
若山莫捫其高湛然若淵莫測其深其粹如玉其精如
金其嚴如秋其溫如春夷險安危死生榮辱確乎中處
一皆不動年十八入相薦引端良責成職任漢士如史
丞相天澤姚左丞樞許左丞衡商參政挺竇學士默尤
傑者也立御史臺以正紀綱立太常寺以崇禮樂剷除
苛虐開布寬平抑奢尚儉薄征厚施由是朝廷清明海

內寧壹倉庫滿盈年穀屢豐天子嘉之曰安圖為相朕
寢乃熟時向承平方與諸儒經畫典制贊理樞機以宗
社奠安為己任以民物阜豐為己責一政失平一物失
所慘然不樂改而後已公退府南開一閣咸進賢士大
夫講論古今治道評品人物得失疊疊應接不倦而請
謁絕跡於清門居第一堂一厨或請創兩廡粗備燕息
者乃曰身足於庇完矣餘室何用神觀端嚴望而尊敬
每旦暮出入過者拱立目送曰是吾安相也及薨木介

三日天下聞之識與不識無不驚哀至有失聲者曰賢相死矣吾復何望薨後十年御史臺及集賢諸儒請加贈謚以昭明德制下乃有今爵封謚以及父武靖王夫人克呼氏封東平王夫人子烏圖岱嗣掌環衛成宗皇帝拜銀青榮祿大夫大司徒領太常寺大德六年正月十一日薨年三十有一武宗皇帝制贈輸誠保德翊衛功臣太師開府儀同三司上柱國追封東平王謚忠簡婦篤思喇氏封東平王夫人男孫一人即今丞相女孫

一人適淮安忠武王之孫樞密副使囊嘉特之子同僉

樞密院事僧格實哩丞相幼從太夫人鞠育稍長兼事

華學凝然端大已兆偉度年十二事武宗嗣掌環衛仁

宗皇帝拜資善大夫太常禮儀使俄遷榮祿大夫大司

徒太常如故又進階金紫光祿大夫加開府儀同三司

延祐七年拜中書平章政事六月陟百揆自初仕介特

不阿剛廉有制衆已有忠憲王之望及作相上輔聖主

下率羣僚恪司彝憲壹靖乃心明嚴峻潔苞苴自絕方

爾謀叶八座道即天工共成聖元無大之業臣稽首論
曰忠憲王襲累葉之勲抱絕倫之德膺世祖紹統之初
際聖代建極之盛天度夙成英猷大肆遠徵近禮廣詢
博采鴻儒獻其所蘊智士竭其所至治化油然以隆風
俗淡焉以厚至元之初何減漢文之世俾得展能專理
期之致寧收效所書蓋不止此然房喬杜晦顯烈寡傳
第功絜德為高宗臣若忠憲王者有立于前或承于後
論相歸賢固當稱首古所謂社稷之臣也嗟乎其始出

鎮也誰歟其再罷相也誰歟議者不能不歸罪阿哈瑪
特僧格也之二罪魁孰與竝立良相之去朝也宜矣世之
公道正如青天白日雲烟有時蒙蔽真風元氣盪滌幹
旋廓乎清明可跂而睹忠憲王之表表在天下是已若
夫紀竹帛銘鍾鼎光在邦家不得騰實同里而垂休華
夏播列蠻夷未必不在斯文其辭曰正統天斲不永以
畀猗維帝元眷命無已烈烈太祖衆始一旅四傑起輔
如龍如虎敵師陸梁走撻之楚諸部大人崩角啓處侃

侃忠武秉鉞專征薄伐遼雷至于海城戮頑植愿百邑
告寧乃趙乃魏自燕南兵齊魯歸明血戰晉并斬闖入
秦咸鳳奠京取厥鯢鯨耄倪不驚金人扼河蹢蹢偷生
有據上游帝建九存有開輿圖帝撫八州於穆世皇瞰
出東方爰相忠憲抒誠進良兩相廿年萬彙皆昌徵車
四馳元老奏康更褒迭進無材不揚文物其章化道之
祥而圖也大而見也定而行也公而守也正巍然山立
賞淑罰慝風行萬國定知誰力忠憲之職世皇之德繫

今丞相相明天子天子倚毗臣無有比何以熙載第思
盡已地紀天經日月重明民安物阜海寓晏清布寫公
方持守盈成維祖規模維孫儀刑在履之貞在繼之靈
文武三相聖輔三帝光輝接日勲庸盖世維元世萬維
帝葉千維無窮年尚徵相賢尋河可源凌岱可巔苟稽
高遠靡趾方邊景行其全不在斯鑠不在斯鑠奚永夫
傳質之自天風雲與宣文鼉負石炳耀山川

丞相淮安忠武王碑

元明善

天以正統命帝元太祖皇帝奮起朔方博爾濟穆呼哩
博勒呼齊拉袞四傑輔之滅克呼滅奈曼滅夏滅金乃
有天下三分之二宋承中華之運西距蜀楚東際吳越
盡有荆揚益三州之野世祖皇帝紹運撫圖肆弘大略
發兵二十萬授丞相巴延不三年而滅宋聖文神武固
勞造化雋功偉烈寔由折衝四傑開之於其前一相擴
之於其後國家接五帝三王之緒保無疆歷服至於億
萬維年而功臣生分爵國死配廟廷有以也夫謹按太

傅淮安忠武王諱巴延姓巴哩氏蒙古部人曾祖考珠

拉格圖以其兵從太祖討定諸部嘗為千夫長贈推忠

贊治功臣太尉開府儀同三司柱國追封淮安郡王諡

武定祖考阿喇嗣官平呼辰有功得食其地從憲宗皇

帝征蜀卒于軍贈推誠佐理翊運功臣太傅開府儀同

三司上柱國追封淮安王諡武康考曉古台佐宗王錫

哩開西域執國事以沒贈崇仁迪慶翊戴功臣太師開

府儀同三司上柱國追封淮安王諡武靖至元初年王

奉使天子世祖見其貌偉聽其言厲曰非諸侯王臣也
其留事朕遣介還報建謀發令才恒出廷臣上由是上
愈益賢之勅中書右丞相安圖女弟昭睿順聖皇后姊
之女女王若曰為已延婦不慙爾氏矣拜光祿大夫中
書左丞相一時君相慶明朝野晏清號為極治七年改
同知樞密院事十年持節奉玉冊立燕王為皇太子十
一年復拜左丞相總襄陽兵伐宋上曰曹彬不嗜殺人
一舉而定江南汝其今體朕心古法彬事毋使吾赤子

橫罹鋒刃王受命馳至襄陽諸軍纂嚴禡師啓行薄郢
州漂水溢塗人病於涉王曰吾且飛渡大江而憚此潢
潦耶度使一騎前導諸軍畢濟郢城恃江為固而兵精
食足耀兵不攻潛由平江堰盪舟而過郢將將二千人
追我王以百騎殿郢人不敢逼平章阿珠公適至郢人
走王手斬其帥趙文義以徇戰禽沙洋守將壓新城而
軍列沙洋俘馘城下不應城陷佩沙洋降將黃順金符
上為招討使炫其榮於宋人以故江陵諸郡相繼送款

遣別帥受之降阿珠公使右丞阿爾哈雅來期渡江不
答明日又來又不答阿珠公自來王曰此大事也主上
委吾二人餘可知吾實乎潛刻期而去將自沙蕪口入
江宋制置使夏貴將精兵守之乃陽言明日圍漢陽夏
貴來援我遣奇兵襲奪沙蕪口大兵咸會江北岸宋戰
艦屬江中餘三十里我以白鷁千艘爭陽邏堡夏貴分
兵拒戰命阿珠公挽舟逆上載死士三千夜渡是年十
二月也明旦王戰夏貴江上兵奪陽邏堡逸夏貴諸將

請曰貴大將而逸之可乎王曰陽邏之捷吾將遣使前
告宋人而貴走代吾使也貴今來矣未幾果以廬州歸
我師既渡江將佐咸賀王曰天子威靈阿珠武勇將校
用命吾何力焉王陳師鄂城下鄂恃漢陽將戰焚其蒙
衝火照城中明日鄂人反漢陽人皆下留阿爾哈雅守
之直取荊湖王與阿珠公等東兵興國蘄黃南康江州
望旗輒靡殿帥范文虎以安慶張都統以池州來二月
都督賈似道舟師十萬陳丁家洲我士賈勇索戰軍容

甚盛似道聞鼓聲先遁其師遂潰獲都督府符印斬虜
無算太平寧國建康無為鎮巢皆送筦籥請城主行省
至建康時江東大疫居民乏食乃開倉賑饑發醫起病
人大歡喜曰此王者之師也有詔時方暑熾不利行師
候秋再舉王上奏曰百年逋寇已扼其吭風馳電擊取
之恐後少爾遲回奔播江海遺患留悔矣上語使者曰
詔爾丞相朕不從中制也十二年七月詔王入朝進右
丞相辭曰阿珠功多臣宜居後以阿珠為左丞相賜從

戰功臣爵賞有差躬受廟謨會諸將於淮安同左丞相
圍揚州未下十月王馳至鎮江分軍三進叅政阿喇哈
以右軍出建康道叅政董文炳以左軍出海道王以中
軍出常州道咸會臨安攻常州守將劉師勇遁諸將請
追之王曰勿追師勇所過城守者膽落矣蘇湖秀州先
師果降阿喇哈文炳皆來駐臨安北宰臣陳宜中發使
來請降日及期宜中逃海軍進皋亭山宋主遣其臣齎
國璽奉表納土命董文炳入宋宮取宋主居之別室封

府庫歸之有司宋滅十三年三月也放散兵衛罷易官

府錢塘沙上三日海潮不至宋人以為天助宋主求見

王曰未入朝禮無相見也留左丞董文炳鎮臨安經畧

閩越四月獻宋主趙昀謝后全后于上都上御大安殿

降封昀為瀛國公遣大臣告成功于太廟上勞王王再

拜謝曰奉陛下成算阿珠效力臣具員而已何有功能

詔以陵州藤州增食戶為六千同知樞密院事十四年

宗王實哩濟畔詔王將兵討之與賊夾水而陣久之不

戰令牧馬具食賊疑而怠俄引兵渡水擊賊實哩濟走
死十八年詔從王太子撫軍北鎮諭太子曰巴延才兼
將相行全忠孝故命汝從王太子次舍必與論天下事
待有加禮伯克哩默色者嘗誣王以死是年得誅罪勅
王臨視王與之酒愴然不顧而回上問其故對曰彼罪
自致臣若臨刑人將不知天誅之公也上賞其量二十
二年宗王阿濟格失律詔王代總北軍遠斥候謹隄防
足兵食明賞罰不肯要功生事將校大和敵人遠避二

十四年宗王納新將反報者還至詔王覘之多載衣裘
以往至其境輒賜驛人納新讌王王以大義語納新納
新陽應而陰欲執王酒闌趨出與其從者潛分三道以
逸驛人以得衣裘故爭獻馬以遞遂脫追騎以其實聞
佐上親征奏李庭董士選師漢軍得以漢法戰金剛努
達布岱進逼乘輿漢軍力戰賊不能陣而走及禽納新
王之謀畫居多二十六年加金紫光祿大夫知樞密院
事總北軍討叛王莽賚特穆爾大戰敗之明日搜其伏

兵追斬二千餘級馳書開諭莽賚特穆爾其人奉書以
泣有譖王于上者詔以御史大夫伊囉勒諾延代之居
王大同以俟後命未至軍三驛王遣使語大夫曰所至
姑止待我翦此寇卿來不後時海都帥大兵以入寇進
我退如是而南七日衆帥怒曰寇至則走何不武若是
果懼戰胡不授軍大夫而誤國事也王曰海都入吾境
持重而殿邀之則遁誘使深入一戰可禽諸軍必欲速
戰戰非吾憚果失海都誰任其咎衆曰請任之王麾軍

邀擊敵兵大敗殺虜幾絕惟海都脫走乃召大夫至軍授印而去三十年十二月驛召至大同上不豫明年正月宮車晏駕遣使召成宗于撫軍王總百官以定國論兵馬使請日昃鳴暮鐘日出鳴晨鐘問其故對曰防變起也王曰汝將為賊耶其如平日宰臣請誅盜內府銀者曰幸赦而盜不可長也王曰盜何時無今以誰命誅人其守正體大多類此四月成宗即皇帝位于上都大安殿時親王有違言王按劔陳祖宗寶訓述所以立成

宗之意辭色俱厲諸王股栗趨殿下拜五月加開府儀
同三司太傅錄軍國重事依前知樞密院事上意欲王
入中書時相忌之王呼相語曰幸送兩罌美酒我與諸
王飲於宮前餘非所知也江南行三樞密院行省臣累
陳非便樞密臣庇之有詔問王王已病張目對曰罷行
樞密兵柄一歸行省於國事為完三院遂罷是歲十二
月薨于京師甘棠里第春秋五十有九遣重臣來賻勅
百官送葬送者盡哀葬于巴濟勒山之先塋夫人別宿

真即扎喇爾氏封淮安王夫人再娶道拉氏生三男滿達勒正議大夫僉樞密院事囊嘉特通奉大夫樞密副使托沁布未仕俱卒副樞娶丞相興元王孫中政使邁珠之女生一男子一女子男桑克嘉實哩正議大夫同僉樞密院事女適資德大夫大都留守鴻和爾巴哈王薨成宗贈宣忠佐命開濟功臣太師開府儀同三司追封淮安王謚忠武仁宗皇帝賜鈔十萬貫畀江浙省臣廟祀臨安皇上勅建碑于都城之郊賜額曰開國元勳佐

命大臣之碑命臣明善製其刻文臣聞忠武王天質高
厚風神靜明英偉端大剛介莊廉當大任而不恐遇大
論而善斷言笑有時喜愠莫測恒負天下之重以神器
奠安為務仁視羣品無間親疎義使英材無比適莫故
四海公論翕然歸之其平宋也將二十萬猶將一人賞
罰信紀律彰大將稟命仰之若神明降人投誠依之猶
父母未嘗妄戮一卒未嘗妄殘一物貨利不足移其心
聲色不足惑其志師入臨安禮賢黜罪市肆不易鷄犬

無驚歸馬蕭然囊惟衣被畢事還朝口不言功連出總
師無役不最嗚呼碩德元才生由間氣良相名將見諸
行事乃知宇宙之間功名之表自有大人也弼成正統
騰耀始日力扶寶運播烈終年請即是而作頌頌曰世
祖聖神地翕天開陽施陰閔鼓盪風雷駕馭羣才鞭笞
九垓糞掃兇災祥慶有來糾糾雄豪英英俊髦樂世之
遭陋時之逃或秉樞機或建旗旄纓冠自獻文奮武招
維忠武王胥會明良雄圖遠韻聖度恢張制曰伊賢當

吏天子左官諸侯奚爾器使乃命之相乃命之將爰資
弼亮爰資開盪嗟茲中土鼎峙三主既殄其二一也無
武天生聖人賚之良臣頸組厥君稽顙軍門東涉扶桑
西跡虞淵北盡窮髮南極元蠻咸受正朔襲我衣冠委
勲不居歸衛帝廬出總北師馬騰士娛輿目睢盱望入
中書鉅材乃儲翊運是須肅將天威劒而登殿揚命羣
王羣王自懷策帝御天下拜登讌是日微王慶會幾變
始知世祖神幾先見故抑王容留垂後憲稽其一德始

終交盡抒誠兩朝力殫無靳進官三公心不增隆追爵
一王道不加崇維王達節高抱孤忠維王獻能茂建元
功紀勳竹帛鑄銘鼎鍾並日不滅與國無窮勅臣作頌
勒之貞石昭示萬國永著臣則

元文類卷二十四

欽定四庫全書薈要卷二萬一百八

元文類卷二十五

元 蘇天爵 編

碑文

丞相順德忠獻王碑

劉敏中

太傅右丞相贈推誠履正佐運功臣太師開府儀同三司上柱國順德忠獻王達拉哈既薨之五年皇慶改元之秋上詔中書故丞相達拉哈弼亮三朝功多不可以

不顯其相地盧溝通達旁勒碑焉且詔臣敏中撰文臣
竊惟有國致治難得賢為尤難是以古之聖王得一賢
則信任之尊顯之使得以盡其能又必褒崇之表異之
示不可忘其勞若太常之紀盟府之藏鼎彝之勒麟閣
雲臺之像不一而足重得賢之難也我元聖聖相承天
祐生賢相臣將臣炳烈相望人才之得於斯為盛若夫
懷遠圖而畧近功先大綱而後小數蘊江海之量負山
嶽之重不威而令行不言而人服處難而無所惑履變

而不可奪端委雍容而朝廷尊安天下受其賜則忠獻
王其人乎上之所以眷眷焉不忘而王之所以荷此表
異之渥也宜矣嗚呼聖人言君使臣以禮臣事君以忠
于茲焉見之臣謹按王諱哈喇哈斯朔方人其族為諤
魯訥氏襲號達拉哈曾祖考諱奇爾實勒贈推忠佐命宣
力功臣太師開府儀同三司上柱國追封順德王謚忠
武祖考諱巴哩察贈協忠翊亮定遠功臣太師開府儀
同三司上柱國追封順德王謚忠毅考諱囊嘉特贈宣

忠効節保大功臣太師開府儀同三司上柱國追封順

德王謚忠愍曾祖妣哈喇沁氏祖妣旺札勒氏妣圖嚕哈

納氏竝封順德王夫人忠武重厚有英才遇太祖皇帝

於飛龍見躍之際知可克將襲之趣告帝為備果至我

兵縱擊大破之尋并其衆以功擢千戶賜號達拉哈時

官制惟左右萬戶次千戶非勲戚不與達拉哈譯言一

國之長帝謂侍臣彼家不識天意故來相害是人告我

殆天所使我許為自在達拉哈矣因賜御帳什器及宴

飲樂節如宗王儀是後所下郡國由奉聖大同至陝西
西域土番雲南遼東未嘗不從推堅蹂強以死力自効
壬辰太宗皇帝畧地河南忠武間出太行反擊燕有功
會病薨子十二人其三忠毅也以勇銳服衆從睿宗皇帝
取汴蔡滅金丙申錫分邑順德病薨二子次為忠愍果
毅有謀以近侍從憲宗皇帝伐蜀多勞績戊午薨于軍
於是王甫及歲而識悟異凡兒目不視戲稍長善騎射
尤習國書聞儒者談輒喜至元壬申世祖皇帝納勲臣

後一見異之命襲號達拉哈長宿衛百人夙夜共職惟

謹嘗從獵馬躓傷面上直如常帝命醫視眷益重明年

秋九月帝御萬壽山王侍賜金段諭曰汝先世勲大朕

且大用汝又明年春丁母夫人憂哀毀踰禮是冬十月

帝獵賽音布拉克歸語皇太子曰達拉哈非常人比可善遇

之乙亥江左平賜廉欽二州益其邑乙酉拜太宗正賜

珠衣一襲時郡縣囚盜詐者上宗正決屬當遣使決死

囚諸道王重按獄詞小不具悉令覆勘奏決者僅六十

人耳尋赦下所活數百人大同民羣鬪毆鷹房三人死
近臣以變聞帝怒亟遣王治止坐其首鬪者京師有以
偽造楮幣連富民百餘家王盡釋之保定諸郡旱民當
輸米京師多以輕資就糴有司撫為奸欲沒其產賞告
者王得其情皆縱去曰舍貴就賤民便事集又何罪為
柄臣擅威福益橫知王惡已忌之數曲為邀致竟不一
往其家僮冒禁殺牛有司莫敢詰王致以法益忌謀撓
王以多事奏請江南囚亦隸大宗正莅決王曰彼間民

教令未孚若一切繩之恐生亂帝是之而止辛卯帝念

湖廣失治欲遣近臣往莫宜王臺臣奏達拉哈在宗正

決獄平即去恐難其人帝曰彼地朕嘗駐蹕治非斯人不

可王遂行隨賜以玉帶授榮祿大夫湖廣省平章政

事湖廣南瞰交趾占城西掖蜀西南接南詔東連吳會

境壤且萬里而八番兩江蠻獠布溪峒間虺蛇起伏跳

踉小戾則相讐殺攻剽無時故治視他省劇甚王至審

利病度先後簡僚佐撫兵民威行德流善遂頑革錢粟

刑獄井井有條自宋時有巨盜嘯黨出沒湖湘殆二十
年不可制王選士付以方畧悉擒誅之江州隸江西省
有滑民餌官府恣虐凡剽船江中羣盜皆與為根穴交
通王知狀徑縛以來百救莫施卒寘於死遠近震悚俄
置行樞密院兵民政分勢不相營姦寇伺發溪峒以閔
壬辰王入覲列其不便罷之帝問王人言廉訪官反撓
吏治朕已令視之卿謂若何王曰憲司職糾姦弊貪吏
所疾妄為謗耳帝以為然及還邊將征交趾出其境王

戒曰無擾我民有奪民魚菜者杖其千夫長一軍肅然
乃上奏曰往年遠征無功民瘡痍未蘇乃復有事非國
善謀也又發湖湘富民屯田廣西為圖交趾計王以徙
民瘴鄉事固難成必且怨叛遣使密奏吏抱券請署不
答俄使還報罷民大悅已而廣西元帥府請募南丹戶
五千屯田襟要謂士不死瘴癘餽有餘蓄實空荒之
地為邕管之蔽制諸蠻控交趾其利有六王喜與之牛
種農器置長統焉聞諸朝至于今便之湖廣舊無夏稅

柄臣援唐宋末世為徵王曰衰弊之政聖朝可行邪竟
奏罷常澧辰等州大水漂民廬多死者王亟發廩為之
賑慰凡災皆如之甲午春正月世皇登遐王謹斥候戒
不虞境內寧肅大德戊戌九月朝成宗皇帝于上都帝
嘉其績授光祿大夫左丞相行省江浙視政凡七日綱
舉七十餘事民風吏習翕然為變入為中書左丞相加
銀青榮祿大夫杭之耆庶伏地攀泣馬不得前王既當
鈞軸益以天下自任每退食延見四方賓使訪以物情

得失吏治否臧人材顯晦年穀豐歉采可行行之凡論
議先以國典參以古制揆以時宜必當而後已其可否
事猶元化之運順無留滯惟不言利不喜變更一以節
用愛民重名爵為務京師先未有孔子廟而國學寄他
署王喟曰首善之地風化攸出不可怠乃奏營廟學嘗
躬為臨視既成朝野瞻聳選名儒為學官奏遣近臣子
弟入學而四方來學者益衆又郊禮久未遑王總羣議奏
行之辛丑同列以或者議倡言世祖皇帝以神武開一

統功蓋萬世陛下未有伐國拓地之舉以彰休烈西南
夷八百婦國弗率可命將往征王謂山嶠小夷去中國
遼絕第可善諭向化苟將非其人未見所利弗聽竟奏
發湖廣兵二萬人丁壯役餽輓數十萬將失紀律果無
功而還諸蠻要擊饑疫相仍比至將士存者纔十一二
會赦有司議釋將罪王曰徼名首釁陷失士馬非常罪
比不誅無以謝天下奏誅之癸卯秋拜中書右丞相加
金紫光祿大夫王常言治道先守令至是選掄益詳時

號得人定官吏贓罪十二章及丁憂婚聘盜賊等制禁獻戶及山澤之利每歲春大駕幸上都王必留守其重可知已時帝疾連歲權移中闈羣邪交扇勢焰翕忽王以身維之姦不得逞事以無撓丙午加開府儀同三司監修國史直僚屬奏修三朝皇后及宗室功臣傳冬十有一月帝弗豫王入侍醫藥出總宿衛且理幾務諸藩王欲入侍疾王拒之丁未春正月宸御晚駕時武宗皇帝撫兵居北王封府庫稱疾卧闕下理幾務如故中闈

以姦臣謀絕北道驛欲行祔廟禮王格其事密記授使
間走踰兩驛始得傳馳報武宗諸懷詐者數欲害王王
不為動內外懷懷視王以安會今上皇太后惟王是
恃姦臣希中旨謀為不軌三月王贊今上皇太后擒滅
其黨發使迎武宗四月今上皇太后如上都王繼往五
月武宗即大位加太保開府儀同三司錄軍國重事中
書右丞相監脩國史賜以憲廟所御白貂裘寶帶未幾
加太傅賜第見其子托歡近侍和林控北邊始置宣慰

時諸部落降者百餘萬口乃罷宣慰詔王以太傅為左丞相行省事賜楮幣十五萬緡黃金贏十二鎰白金二千五百兩帛四百端乳馬六十疋皇太后賜楮幣五萬緡帛二百端至和林獲盜米商衣者即斬以徇攘竊屏息行旅為便分遣使發廩賑降口復奏請錢七千三百萬緡帛稱是易牛羊給之又給網數千令取魚食遠者厄大雪金山命諸部置傳車相去各三百里凡十傳餽米數萬石牛羊稱之又度地立兩倉積米以待來者全

活不可勝紀有饑乏不能達和林往往以其男女弟姪
易米以活皆贖歸之和林歲糴軍餉恒數十萬主吏視
利繆出納囊橐滋弊久矣立法以遏其源稱海屯田廢
弛重為經理歲得米二十餘萬斛益購工治器擇軍中
曉耕稼者雜教部落又浚古渠溉田數千頃穀以恒賤
邊政大治至大改元戊申帝賜大帳如親王制諸藩稟
命戎事則以宴之仍賜酒米百斛皇太后今上咸有賜
焉天下傾耳以俟復召是冬十一月遘疾召其屬曰吾

不起矣不得報國矣汝曹各自勉此間金穀勿貽朝廷
慮其屬以聞帝驚愕命醫偕其子托歡行以閏月某日
薨于和林所居之正寢春秋五十又二天雨木冰連日
帝大傷悼遣近臣慰諭其子賜賻錢五萬緡今上賻錢
二萬五千緡勅大興尹買葬地昌平陽山南之原曰使
天下後世知吾賢相耳乃胥議為石塚柩至以是月二
十有九日葬焉近而朝著遠而士民以及四方慟哭流
涕嗟悼懷慕及奠于冢者無有已也明年己酉八月有

封謚之命先配舒爾圖氏繼室扎拉爾氏扎拉氏扎拉爾氏拉哩氏並追封順德王夫人一子即托歡由近侍為太子賓客今上御極遷御史中丞進大夫官榮祿大夫襲號達拉哈博貫經史特立正言得風憲體皇慶改元壬子制加王曾祖考而下三世爵謚大夫之母旺札勒氏封順德太夫人王為人神宇靖偉簡重寡言不見喜愠望之儼然知其為公輔器其在宗正也從世皇北巡平宗王亂初入叛境王率三百騎猝與敵遇徐整騎突出

敵背連穀矢殪數人敵披靡遁帝壯之其在中書也引
儒生討論墳典至堯舜禹湯文武之為君臯夔稷契伊
傅周召之為臣歎曰人生不知書可乎乃館士教其子
學由是而觀王之文武志畧本乎天性奮身逢時發於
至誠故其事業之見于世剛明正大歸巍煒燿如此嗚
呼古所謂大臣者王為無愧矣臣既述其事乃繫之以
詩曰漢有文成難制將變元有忠武患去未見掖聖承
天偉績共貫忠武有孫維王忠獻維嶽降靈維王以生

雲風類從近列以升穆穆世皇羣材權衡孰大予任王
予是稱利器所施宗正焉始挺然鶚立獄平政理朝有
臣姦王不以齒有媚不答姦氣為褫帝念湖廣控馭匪
宜陟之鼎司曰汝往釐霜肅露濡化行若馳島蠻海夷
悅服熙熙移杭未旬入總大政民有怙恃事有龜鏡惡
者自懲善者相慶百度亶亶咸統于正成宗上仙回邪
請張勢挾中闡構謀非常王翊潛龍寘彼斧斨伊霍之
重賴其胥匡武皇嘉之康錫三接朔方往撫有聞赫赫

一夕隕星山圯棟折遄歸之望竟莫爾愜天子曰嘻斯何人斯何紓予思其碑而辭大書深刻九達是向尚千萬年監此良相

駙馬昌王世德碑

張士觀

至治元年十二月癸亥制贈駙馬昌王阿實克高祖巴圖為推忠宣力佐命開國功臣太師開府儀同三司駙馬都尉上柱國追封昌王謚忠武高祖妣公主托摩倫公主庫克新並追封昌國大長公主曾祖索隆噶宣忠保大

翊運開國功臣太師開府儀同三司駙馬都尉上柱國
追封昌王謚忠定曾祖妣公主布爾噶追封昌國大長
公主祖扎呼爾沁推誠靖遠佐運贊治功臣太師開府
儀同三司駙馬都尉上柱國追封昌王謚忠靖祖妣公
主伊遜沁追封昌國大長公主父和琳効忠保德輔運
佐理功臣太師開府儀同三司駙馬都尉上柱國追封
昌王謚忠宣妣公主巴雅爾公主布呼齊並進封昌國
大長公主公主伊勒噶雅追封皇姑昌國大長公主既

頒卹典又詔翰林文諸石臣士觀祇奉明詔按世系王

族為伊奇哩氏以小字阿實克行忠武蚤逢興運從太祖

皇帝起朔方同諸豪傑飲水于黑河要結盟誓經啓疆

宇初太祖遣使四方詢訪人情至忠武所時忠武止畜

一牝羊烹其羊迎勞使者又以使者馬瘠易以已之良

馬使回併烹牝羊餞之使者復命具以忠武誠款對上

嘉之遂以皇妹托摩倫公主下嫁實生忠定托摩倫公

主歿繼尚皇女庫克新公主嘗從征奈曼翊衛左右未始

少離上閔其勞以所獲戶民多賜其部我師既破長城
右遣國王穆呼哩經畧北京左遣忠武規取阿布哈伊
瑪哈等城所得漢民即賜忠武且諭旨曰諸部各遣子
弟入侍時和囉羅武谷爾巴岱違旨命忠武提兵千人
誅之以令衆復以所隸百姓賜之迨上征河西扈蹕戎
行備著勤勞師未旋鼎湖上仙甫旬日忠武亦卒太宗
震悼不已曰巴圖事我皇考宣力良多今已云亡送還
本土遂葬於奇濟爾仍禁其地三年如國家制忠定繼

起擢為萬戶尚宗女布爾噶公主總戎南征攻嘉州破
之師還卒於道忠靖從定宗皇帝討平邁努有功尚宗
女伊遜沁公主忠宣先尚憲宗女巴雅爾公主以錫里
濟叛屢著戰功繼尚宗女布呼齊公主征納新扈從乘
輿忠勤備至世祖憐之賜名巴圖巴圖譯云驍勇也維
伊奇哩氏世篤忠貞積慶流祉至王益大王生資英果
年十五已能從征納延躬履行陣至今不懈却敵奏功
者屢矣是以尚宗女薩爾達沁公主歲辛丑與都瓦戰

射中其足敗之成宗錄其功以皇女伊勒噶拉雅公主下
嫁是生今上皇后及晉王妃伊琳沁巴拉繼尚憲宗女
孫邁廸公主武宗即位襲為萬戶賞賚優渥頒金印封
昌王仍置王府迨仁宗朝賜文豹及海東青白鶻歲以
為常今上即位賜楮幣一萬定西馬及七寶帶各一太
皇太后繼賜楮幣萬定子七人曰實喇呼岱尚宗王穆
訥子東伊勒沁公主薩爾達沁公主出也曰噶臧巴拉
曰阿喇特納實哩邁廸公主出也曰達哈曰克諾多爾濟

監臧多爾濟臣竊惟繇漢以來言世家者必曰袁氏之
四世五公高密之重侯累將載在方策以為美談王家
繇高曾以來載德象賢忠事我朝至於奕世封王一門
尚主國家所以崇德報功斯亦至矣其寵貴視袁氏鄧
氏宜無少讓而降名偉績則又過之以之銘鍾鼎書竹
帛其誰曰不然臣士觀謹再拜稽首而獻銘曰

於皇聖元受命于天羣雄入彀載造坤乾忠武崛起儷
景同翻翼佐王烈執銳被堅矯矯忠定奮其才賢光依

日月躬屬橐鞬四征弗庭所向無前在定宗世孽豎擾
邊乃命忠靖扈蹕周旋與謀帷幄奏捷戎軒忠宣繼之
不懈益虔却敵伐戎智勇兼全篤生昌王于蕃于宣靖
氛沙漠忠力益殫惟帝念勞追卹其先何以寵之國姻
世聯何以貴之王爵世延詔紀金石誓肩河山特以表
忠千載永傳

曹南王世德碑

虞集

中書右丞相臣某等言陛下入正大統道汴共命山東

河北蒙古軍都萬戶府都萬戶伊蘇岱爾以其兵從至京師以功拜河南等處行中書平章政事於法官一品當贈三代官封伊蘇岱爾曾大父博碩大父伊爾根父阿勒哈嘗為大將戰功多又多死王事軍中宜追封以第一等爵制曰可有司以詔書議贈所當得官按地定封於是故贈定威佐運功臣榮祿大夫司徒上柱國曹國公謚忠定博碩加贈定威佐運功臣光祿大夫司徒上柱國追封曹南王謚如故故蒙古漢軍都元帥贈宣

忠靖遠功臣光祿大夫中書右丞相上柱國曹國公伊爾根加贈宣忠靖遠佐運功臣金紫光祿大夫中書右丞相上柱國追封曹南王仍謚桓毅故光祿大夫中書左丞相贈協謀佐理功臣太師開府儀同三司上柱國曹國公謚武定阿勒哈加贈竭誠宣力定遠佐運功臣太師開府儀同三司上柱國追封曹南王改謚忠宣曾祖母達巴祖母默埒母托端庫庫楞皆先封曹國夫人改封曹南王夫人制下有勅國史臣集其以曹南王世

家行事歲月著文於碑臣受詔謹按博碩蒙古扎拉爾

台氏太祖皇帝初起朔方豪傑之士雲起響應而從之
為之腹心爪牙者必皆有深智遠識有勇而善謀是以
東征西伐無不如志以成萬世之業者天為之生才而
聖神善用之故也博綽自其幼年已在宿衛為和爾齊
和爾齊者服御弓矢常侍左右者又為博羅齊博羅齊
者親烹飪以奉上飲食者也蓋非篤慎強敏見知而親
信任使者不得預是以屬車所向無不在行數以徇戰

畧地著功受賞太宗皇帝即位仍以其職從征行隴北
陝西之役攻城辟取郡縣率先戰士竟死之伊爾根繼
為和爾齊博囉齊膺其父之職也太宗之命事伊勒
吉太子為審衛之長歲乙未庫克楚呼都克圖太子出師伐
金遂侵宋有旨出從戰戰有功拜萬戶方是時察罕以
太祖所拔重臣為大將位望崇甚而伊爾根以天下馬
步禁軍都元帥為察罕之副總領諸翼蒙古漢軍馬統
領屯戍大軍南面之征最為重兵矣於是取陝西掠河

東踐河南歲乙卯擣光壽大帥察罕歿憲宗皇帝命伊爾根代之拜諸翼軍馬都元帥統大軍攻淮東西諸城歲戊午帥師至揚州數出戰遂以戰死阿勒哈以諸翼蒙古軍馬都元帥統其父之軍從世祖皇帝南伐宋憲宗崩世祖北還即皇帝位從至伊勒巴延布拉克之地阿爾布格阿勒達爾琿達罕興兵為亂不受詔命討之至勒哈以其所部蒙古軍擊之北至實默圖之地遂追之至河西功成而還中統建元之歲賞功賜黃金五十兩二

年濟南帥李壇以山東反大發兵討之阿勒哈總其衆
次老倉口以進戰明年濟南破壇誅山東平師還又明
年賞功賜黃金虎符一銀印一以舊官將其軍至元初
大軍伐宋五年師圍襄樊力戰數有功十一年取宋大
軍渡江阿勒哈以其師取鄂州沂江陵下至京口所至
郡縣降其軍慰撫其民人明年拜昭毅大將軍統其師
發建康道溧水溧陽指獨松關抵杭州上方道與宋將
吳某等戰斬之斬首七千級又與宋將祝亮戰擒亮并

其裨校七十二人斬首三千餘級又與宋兵戰斬首七

千餘級又斬逐其援兵退走數十里宋將奉使吳某都

統丁某總制趙某來迎戰敗之斬首三千級擒總制谷

某又擒宋將張八及其裨校斬首二千級六月即軍中

拜中奉大夫行中書省參知政事是年宋亡明年丞相

已延以宋主入覲九月阿勒哈帥師東渡浙取越明台

溫衢婺處及閩中諸郡追宋宗室秀王某遁數戰皆敗

之降其運使趙某提刑趙某五百餘人至福州與宋軍

轉戰四十餘里斬步帥觀察使李世達等於陣殲其軍
獲秀王及其家屬將吏百八十餘人降其部曲淮卒三
千人於是江南悉平十二月有詔以中奉大夫中書參
知政事授金虎符行江東宣慰使郡縣新附民心未安
威信所孚莫不悅服十四年入覲上嘉其功進拜資善
大夫中書左丞仍留宣慰江東十八年入覲方是時海
內悉已平定舟車所至莫不服從而日本叢爾海島之
間彌固自保有司以致為言天子從之廼賜玉帶弓矢

命為中書左丞相行省事統蒙古諸翼軍馬四十餘萬
往征之師次明州且渡海矣歿焉既歿而子伊蘇岱爾
幼貝姓伊蘇岱爾之兄也襲世職為萬戶總其軍後以
功僉書江淮行樞密院事進拜江浙行省右丞福建行
省右丞河南行省平章政事仍領其先世萬戶軍馬既
歿伊蘇岱爾以元貞元年世其職受昭勇大將軍左手
蒙古軍萬戶延祐三年覃恩加昭毅大將軍泰定三年
進昭武大將軍皆以萬戶總其軍如故後二年今上皇

帝南還京師將有大正於天下道過汴梁令太保已延
公方鎮汴梁八月庚子召伊蘇岱爾帥其兵以行乙巳
兵大集士卒感激赴義車馬器械精備勇氣百倍丁未
命為本省參知政事師行庚戌進平章政事仍兼山東
河北蒙古軍都萬戶府都萬戶九月庚申同知樞密院
事仍兼都萬戶壬申皇帝即位大明殿建元天曆明日
拜知樞密院事授以樞密院印仍領其萬戶事甲戌圖
們岱爾自遼東引兵寇通州令伊蘇岱爾帥諸翼軍馬

出禦之丙子王禪等之兵軍於北皇后店伊蘇岱爾移
兵合擊敗之己卯哈喇齊呼圖克特穆爾阿拉特穆爾之
兵軍昌平縣東白浮村帥師合擊敗之壬午錫保齊大
都之兵軍於昌平縣東北又帥師合擊敗之凡來寇之
兵悉已敗衄總兵者或執或敗走北面悉平癸未太師
右丞相會諸將於龍虎臺下奏凱於朝有勅命伊蘇岱
爾守居庸之北關壘石以為固十月己亥拜榮祿大夫
知樞密院事依前兼管都府事統領諸翼蒙古軍馬使

出師禦寇兵之西入者師次廣平磁州之武安縣敗獲
總兵者額森特穆爾等而西南諸郡以次告平庚子召
還十一月丁亥樞密院奉勅散諸軍行院官還京師明
年二月以舊官復拜山東河北蒙古軍都萬戶府都萬
戶五月上之上都伊蘇岱爾仍帥其所統兵從十月癸
卯皇帝若曰伊蘇岱爾屬橐鞬以備干城恪恭職事朕
用嘉之其以為河南行中書省平章政事十一月丙寅以
所統兵置大都督府命兼山東河北蒙古軍大都督

秩從二品刻銀印賜之已已有封贈之命嗚呼上之所

以待功臣將帥寵錫榮耀不亦甚乎臣嘗聞之自昔國

家所貴有勲舊之臣者以其君臣之契深宗社之事諗

逆順向背之道素定于見聞而愛敬之誠自有不能已

者故其得備戎行氣決志憤以能成功也世祖皇帝既

定海內以蒙古一軍留鎮河上與民雜耕橫亘中原故

將委忠君於國人備非常於他日其所以為子孫計者深

且遠矣今上皇帝以天縱之資歷造昧之久奮名義以

致討夙逆應天人而歸履大位固歷數之所在也若曹
南王家自開基以來已入備禁衛出死行陣者三世矣
今平章以其世守之舊兵奉中興之大業以致真王之
封食所居之邑聲振大藩受軍民之寄福祿方未艾也
嗚呼偉哉敢再拜稽首而為之銘詩曰昔在太祖受命
自天聖子神孫師武用宣世祖赫赫一是萬國虎臣孔
多貴有世績忠定之興承國肇基乃執干戈乃奉鼎彝
不寧方來先後奔奏盡瘁殞身以昌厥後有揭桓毅益

信以崇帝討王誅無往不從金氣既衰宋亦就蹙兼
弱攻昧我帥我督截彼淮浦其流湯湯蹀血以終厲我
國殤克繼父祖忠宣之武天錫之功世皇是輔肅肅南
征絕江擣城左纛振旅馳追不庭世皇御天於鏖如日
式圍不遺聲教廼訖于時出師有專有分江漢之間忠
宣所軍蒙衝載兵遡江薄海列郡風靡有順無悔旋
指江東進師合攻闕柵兒嬉孰當吾鋒斬將連營覆卒
盈野乃會元戎于城之下孿孿孿發解璽入朝掠其餘

疆曾不崇朝既定甌越成功來告命以相臣持節東道
治以歲成位以序升入覲天子龍光是承天子曰嘻蠢
彼海裔爾相予佐帥士以濟臨涯揚舲海若彌靈天不
憖遺亟賁將星忠宣所統國人之勇留戍羅絡齊魯梁
宋鼓旗間間武帳在中既世其官又世其功今我聖皇
中興以正錫鸞在塗萬騎前乘誰其將之不二之臣彼
壘於郊摧之為塵聖皇賞功寶玉鷹馬還長其鎮為
國召虎額額爾軍何以表之爾建大府都督之旗爾家

于曹有桑有土昔公今王三世之祐豐碑列功備書三
王咨爾多士勤忠勿忘



元文類卷二十五



總校官候補中允臣王燕緒

校對官編修臣許兆椿

膳錄監生臣應先烈